

Zjawny list nastupajo njeprizwolenja zarjadowanja přichodneho 7. lětnika w Ralbicach

Zwjazkowe předsydstwo Domowiny - Zwjazk Łužiskich Serbow z. t. je na swoim wuradźowanju dnja 16.04.2011 w Budyšinje na wědomje wzało, zo njeprizwoli so zarjadowanje přichodneho 7. lětnika na Serbskej srjedźnej šuli w Ralbicach. Zwjazkowe předsydstwo Domowiny žada sebi cofnjenje tuteho zarjadniskeho připowědženja Sakskeho kultusoweho ministerstwa.

Tute postupowanje rani artikel 6 wustawy swobodneho stata Sakskeje. Dale njewotpowěduje wotpohlad Europskej charće regionalnych abo mjenšinowych rěčow.

Škit naroda woznamjenja škit rěče. Škit rěče wužaduje sebi wosebite rjadowanje a z tym zachowanje wšitkich serbskich kubłanišćow.

Znowa je postupowanje kultusoweho ministerstwa swobodneho stata Sakskeje znamjo, zo nimaja Serbja prawo słyšenja a sobupostajowanja w kubłanskich naležnosćach, kaž sej to delegaća 15. hłowneje zhromadźizny Domowiny njedawno w Delnim Wujězdze wospjet žadachu.

Zwjazkowe předsydstwo žada sebi zdźerženje wšitkich dotalnych serbskich kubłanišćow a wobstejacych lětnikow.

Njedopusćenje jednotliwych lětnikow wohrožuje zdźerženje serbsčiny w nakromnych regionach a je zdomom kontraproduktiwne za Witaj-hibanje. Z tuteje přičiny wotpokazuje Zwjazkowe předsydstwo kompromis wotměnjaceho zarjadowanja lětnikow mjez nošerjami šulow.

Zwjazkowe předsydstwo wočakuje w tutej naležnosći krótkodobne wuradźowanje ze zamołwitymi kultusoweho ministerstwa z Domowinu, ze Serbskim šulskim towarstwom, ze Serbskej radu, ze serbskimi zapósłancami krajneho a zwjazkoweho sejma, z komunalnymi nošerjami a wjednikomaj šulow Ralbicy a Worklecy.